

摘藻堂四庫全書薈要

集部

欽定四庫全書薈要卷一萬七千二十一

集部

甫田集卷十一

明文徵明撰

詩五十首

送冢宰朱玉峯之南京

留司晚望重衡鈞三十年來侍從臣
遠去獨安恬退節
衆中欣見老成人
兩京規制遙相望
六代江山蹟未陳
盛世宦遊應自樂
有人東望惜音塵

晚通仕籍喜同朝
此去江東屬望勞
留務從來須長者

雅懷自喜得閒曹百年家世睢陽重一代文章甲榜高
去去壯遊知未已秋霜才入髻邊毛

送孫從一編修僉憲浙江

羨君瀟灑玉堂仙顧我飄零亦儋負海內論交兼兩世
班行聯署恰三年別腸忍折燕臺柳宦況遙飛越水船
誰謂江南身漸遠憂心常在五雲邊

盛斯顯南京司封

薊門秋風天早寒潞河生波楊柳殘沙塵吹衣日色薄

仙郎九月辭長安長安東下浮官舸去去心馳大江左
人情往往計南北委順知君無不可憶我前年入國門
連珂接珮多鄉人豈無同朝歡不及同鄉美蕭條逆
旅中吳音更堪喜宦轍羈人不得齊一朝散去各東西
向來坐客日以減子行更使吾悽惋何如重爲交遊惜
再世通家非一日況也葭莩添姻戚人生得意無南北
我漫惜君君自適建業江山天下奇聖皇昔此開鴻基
穹宮傑構比豐鎬列職分曹同保釐百年形勝真雄壯

奕葉名家更清暢畫省雍容如列仙簿書蕭散清而閒
坐曹讀書百不關有時騎馬看鍾山

送趙麗卿

青驄款款旆悠悠遙指孤雲向石頭到日長安應在望
夕陽江上更登樓

旅居鄰近最多情幾度趨朝並馬行今日吾留君却去
共誰長樂聽鐘聲

西風吹散馬頭塵忍見南來白水津不獨別離傷遠道

哀遲亦是要歸人

清秋北鴈盡南征我獨東歸計未成爲語金陵文酒伴
年來白髮滿頭生

送洪玉方

才接鴛行喜有餘又驅王事駕輶車君頻有役難爲別
我老思家欲附書道路風波方浩蕩歲寒冰雪定何如
此行國計從知重四海民勞亦可虞

送于器之廉憲還滁

東風吹盡燕臺雪，潞水垂楊已堪折。自笑人生得幾時，
三年兩度都門別。都門日日有行人，我獨與君情最親。
向來宦轍苦南北，去此尚是江湖身。君向江湖我塵土，
從此雲山亦修阻。豈惟去住隔雲泥，本自疆封限吳楚。
憶得滁陽始相見，紺髮垂雲俱弱冠。四十年来轉首空，
升沈異勢容顏變。不獨容顏改舊時，世情翻覆浮雲移。
江湖風月足濤浪，道路天險藏嶽巖。君能不易平生志，
豈識人間有機事。不將嫵媚獵時名，更樹風聲招物忌。

踐敗中外垂廿年空囊羸馬意蕭然昂藏不受世人識
骯髒徒爲知己憐知己憐君君不恨浙水東西有公論
但須俯仰面無慚未怕伶俜身獨困平生頗厭乞墻徒
昏夜哀憐正堪憫若教游宦損初心相去中間不能寸
此志悠悠我獨知青山不負當年期幽谷雲深每獨往
瑯琊月出詠歸遲醉翁亭下泉堪釀君去歸兮我惆悵
四時朝暮古人情同負幽懷不同賞

送盧師陳奉使紫荊關

季冬繁霜雪塞草寒不菲之子遵朔方駕言即長岐揚
旂灞水北促轡漁陽西豈不念修阻王程有嚴期丈夫
既策名委身事馳驅諮諏重將指辛苦焉得辭况君志
遠遊夙昔攻文詞上谷古雄鎮幽并勢威夷於焉寄慷
慨亦足宣遐思豈若抱棄人終年守金閨鳴珂紫雲闕
端簡白玉墀通籍豈不佳旅進曾何裨古賢榮有事去
子行無稽念惟羈愁中復此相仳離長風西北來吹我
雙髻絲高歌激清商願倒風前卮

送王承恩侍講叅政四川

鳥道巖巖萬里賒從臣分省向三巴中朝聲望雲山重
內史文章錦水華爛熳新恩蒼玉節依然舊署紫薇花
只應未忘論思地翹首金鑾北斗斜

送蔡巨源叅政

廿年湖海漫相知再見都城總別離旅客倦遊常卧病
使君王事有程期清風萬里閩山節明月孤舟潞水思
塵土欺人雙鬢短不知何處更論詩

送陸舉之

三載追隨供奉班，方舟千里又同還。
君行問寢辭青瑣，我已焚魚住碧山。
塵土自憐羸馬倦，江湖莫羨白鷗閒。
匆匆手袂何須戀，剡曲吳淞一水間。

致仕出京言懷

獨騎羸馬出楓宸，回首長安萬斛塵。
白髮豈堪供世事，青山自古有閒人。
荒餘三徑猶存菊，興落扁舟不爲蓴。
老得一官常卧病，可能勲業上麒麟。

白髮蕭疎老秘書倦遊零落病相如三年漫索長安米
一日歸乘下澤車坐對西山朝氣爽夢回東壁夜窓虛
玉蘭堂下秋風早幽竹黃花不負余

馬上口占謝諸送客十首

三忠祠下夕陽明幾度含情送客行今日諸君還送我
多應不異昔時情

昔時送客每懷歸千里鄉心日夜飛回首三年幾離別
只應今度不沾衣

小試閒官便乞身素衣曾不染緇塵諸君亦自多情致
不送官人送散人

散人廿載盜虛聲敢謂從前少宦情補袞銘鐘羣彥在
功名原不到書生

解却朝衫別帝州一竿煙水五湖舟故人莫作登仙看
老病無能自合休

諸君送我帝城東立馬傳杯犯朔風莫嘆柳枯難折贈
春光都在酒波中

別酒淋漓滿路歧
酒闌無奈客東西
多情獨有斜陽色
一路殷勤送馬蹄

浮雲世事兩悠悠
一出都門百念休
獨有懷人情不極
雙溝南畔數回頭

立馬雙橋日欲斜
沙塵吹霧暗征車
從今絕跡江南去
只見青山不見沙

三載愁聞長樂鐘
夢魂常繞五湖東
此身忽在扁舟上
開眼猶疑是夢中

阻冰潞河簡同行黃太史才伯

長河十月朔風悲零落貂裘不受吹冰雪崢嶸驚歲晚
江湖寂寞滯歸期誰憐阮籍窮途泣自笑穰侯見事遲
忽憶同行黃太史篝燈何處擁書帷

次韻答徐子容學士見懷三首

解却從前供奉衣朝行除籍簡書稀非關疎拙明時棄
自惜驅馳雅志違飄泊又驚年欲暮蹉跎再見月流輝
玉堂學士青雲上也念天涯人未歸

霜華慘淡襲征衣
關朔蕭條鴈影稀
遊子天涯苦行役
故人歲晚惜分違
還家短夢秋無賴
伴客殘缸夜有輝
猶勝前時羸馬上
滿頭風雪趁朝歸

南來拂拭芰荷衣
旋覺沙塵出郭稀
我已去來無復戀
天於人事每多違
流澌十月關河冷
積雪千山草木輝
想見幽居無限好
春風應待主人歸

次韻荅唐雲卿禮部二首

關河歲晏客衣單
滿髻秋風裹鵝冠
塵土自憐疲馬倦

江湖誰念白鷗寒
去來信有天機在
閱歷方知道路難
憔悴不忘飄泊處
方舟冰雪路河干

飄泊東吳萬里船
漫勞詩帖慰窮年
君知世有東方朔
我愧身非魯仲連
夢斷五湖天渺渺
愁懸雙杵月娟娟
相逢總是羈棲者
目送飛鴻共黯然

次韻荅張西峯少叅

司空揣分自宜休
元亮無心任去留
四海何人憐白髮
百年吾道有滄洲
破除塵夢惺惺在
點檢山林事事幽

即去已輸君一着十年前與白雲遊

臘日與才伯小酌追懷去臘午門賜宴

去歲嘉平燕紫宮長筵錯落午門東一時隨例沾恩澤
此日追思嘆轉蓬節敘不禁雙鬢改江湖猶幸一樽同
柳條萱草何須問且共天涯目斷鴻

旅懷

陰凝冰未泮雪盡歲還窮世事浮榮外生涯久病中心
旌搖落日天影度冥鴻短髮垂垂白那堪犯朔風

野行因過廢寺

久客念搖落意行還寂寥
餘寒棲短褐斜日帶荒寮
歲事行將盡羈魂黯欲銷
雲房才咫尺便覺遠塵囂

某比以筆劄逋緩應酬爲勞且聞有露章薦留
者才伯貽詩見戲輒亦用韻解嘲

不用浮文薦子虛底須滄海問遺珠
若爲尚作嵇康累
嬾慢難酬滿案書

絕澗深林付窅冥三年慚負草堂靈
青山應笑東方朔

何用能優辱漢廷

千年處士說林逋
漫有聲名達帝都
只辨梅花新句好
莫論封禪有書無

春風次第水增波
千里清淮一棹過
更恐南行勞應接
隨堤新柳似新鵝

平生藝苑說荆關
點筆雖忙意却閑
何用更騎黃犢去
右丞胸次有江山

才伯過訪

落日生愁地窮陰欲雪天歸心聞斷鴈衰鬢逼殘年光
景陳編裏情懷薄酒邊平生黃叔度相見即欣然

除夕二首

撥盡壚灰夜欲晨不知飄泊潞河濱燈花自照還家夢
道路誰憐去國人浩蕩江湖容白髮蹉跎舟楫待青春
只應免逐雞聲起無復鳴珂候紫宸

黯黯離愁酒半醺不眠閒讀送窮文旅窓燈火寒猶在
村巷雞聲歲又分千里家山歸有漸百年心事老無聞

未妨去國還飄泊已把閒身等白雲

丁亥元日次才伯韻二首

東風早晚到天涯客子逢春正憶家
栢葉漫傳元旦酒江梅應發故園花
不愁逆旅無親戚依舊江湖有歲華
深負鄭莊騰薦剡遊巖痼疾久烟霞

鄭謂啟
範也

朝日曛曛照水涯春風次第到貧家
輕烟漠漠初含柳殘雪飛飛不作花
芳草開筵酬上日紫雲飛鞚憶東華
即須作伴還鄉去滄海東頭看落霞

冰泮志喜次才伯韻

吹面東風不作寒，斷冰千片下晴灘。
已看積雪經冬盡，正好垂楊映水看。
滿目江山勞應接，到家櫻筍未闌殘。
只應今夜扁舟夢，先繞吳門鬪鴨關。

過揚州登平山堂二首

鶯啼三月過維揚，來上平山郭外堂。
江左繁華隋柳盡，淮南形勝蜀岡長。
百年往事悲陳跡，千里歸人喜近鄉。
滿地落花春醉醒，晚風吹雨過雷塘。


平山堂上草芊綿學士風流五百年往事難追嘉祐蹟
閒情聊試大明泉隔江秀色千峯雨落日平林萬井烟
最是登臨易生感歸心搖落片帆前

還家志喜

綠樹成陰逕有苔園廬無恙客歸來清朝自是容疎嬾
明主何嘗棄不才林壑豈無投老地烟霞常護讀書臺
石湖東畔橫塘路多少山花待我開



甫田集卷十一



總校官庶吉士臣張能照

校對官助教臣黃昌禔

騰錄監生臣董邦本

騰錄監生臣鰲圖

欽定四庫全書薈要

集部

甫田集卷十六

二五

詳校官候補通政司經歷臣郭祚熾



欽定四庫全書薈要卷一萬七千二十二

集部

甫田集卷十二

明文徵明撰

詩二十七首

李少宰杭中丞劉柴二光祿置酒

丁亥

雍容總卧龍清時吏隱大江東黃花初過重陽節
白髮來邀栗里翁豈有聲名驚四海解忘形跡荷諸公
浮塵不到清樽畔舉扇無勞障北風

趙麗卿侍御邀遊冶城

落木蕭蕭帶遠空
冶城高處見秋風
重將白髮遊江左
依舊青山似洛中
有客樽前談夢鹿
何人天際慕飛鴻
荒塹寂寞埋秋草
猶自風流憶謝公

徒步至寶光寺

布襪青鞋短褐衣
酒樽詩卷一僮隨
白頭自笑曾供奉
徒步誰憐老拾遺
五畝喜聞秔稻熟
重陽還恨菊花遲
松寮竹谷道遙地
時有山僧乞小詩

九日與彥明登雨花臺

雨花臺上雨初乾
野色江光落坐間
豈謂旅遊逢九日
共來把酒看三山
老年節物偏生感
到處雲林不負閒
落木滿空秋萬里
暝禽遙帶夕陽還

題蘭

炎夏悠悠白晝長
空齋睡起拂匡牀
不須甲煎添金鴨
風泛崇蘭滿几香

瀟湘八景

濕雲載秋聲
萬籟集篁竹
江湖白髮長
獨擁孤篷宿

右瀟湘夜雨

月出天在水平湖淨於席安得謫仙人來聽君山笛

右洞庭秋月

孤帆落日明青山相映帶遙遙萬里情更落青山外

右遠浦歸帆

征鴻戀迴渚欲下還驚飛葦深繒繳繁歲晚稻粱微

右平沙落鴈

雞聲茅屋午靄靄墟烟白市散人亦稀山空翠猶滴

右山市晴嵐

曬網白鷗沙衝烟青箬笠欵乃一聲長江空楚天碧

右漁村夕照

日沒浮圖昏遙鐘出烟嶺應有未眠人冷然發深省

右烟寺晚鐘

密雪灑空江雲冥天浩浩寧知風浪高但道漁蓑好

右江天暮雪

畫牡丹

粉香雲暖露華新
曉日濃薰富貴春
好似沈香亭上看
東風依約可憐人

憶昔四首次陳魯南韻

三年端笏侍明光
潦倒爭看白髮郎
咫尺常依天北極
分番曾直殿東廊
紫泥浥露封題濕
寶墨含風賜扇香
記得退朝歸院靜
微吟行過藥闌傍

紫殿東頭敞北扉
史臣都着上方衣
每懸玉珮聽雞入
曾戴宮花走馬歸
此日香鑪違伏枕
空吟高閣靄餘輝

三年歸卧滄江上猶記雙龍傍輦飛

扇開青雉兩相宜玉斧分行虎旅隨紫氣氤氲浮象魏
彤光縹緲上呆愚幸依日月瞻龍袞偶際風雲集鳳池
零落江湖儔侶散白頭心事許誰知

一命金華忝制臣山姿偃蹇漫垂紳愧無忠孝酬千載
曾履憂危事一人陞擁春雲嚴虎衛殿開初日照龍鱗
白頭萬事隨煙滅惟有觚棱入夢頻

竹雀

落木蕭蕭苦竹深茅簷斜日喚雙禽棘叢豈是藏身地
三月春風滿上林

千葉梅與方山人同賦

絢梅奕葉照瓊枝不是橫斜舊日姿繁雪吹香春翦翦
冷雲團樹玉差差羅浮夢斷情稠疊瑤圃風生珮陸離
一任堦前明月碎清真不負歲寒期

靜隱

掃地焚香習燕清蕭然一室謝將迎坐移白日花間影

睡起春禽竹外聲
心遠自應人境寂
道深殊覺世緣輕
問奇尚有門前客
却恨青山不捨名

顧華玉以書邀予爲西湖之遊
病不能赴詩以謝之

舊約錢塘二十年
春風擬放越溪船
却憐白髮牽衰病
應是青山欠此緣
漫說西湖天下勝
負他北道主人賢
只餘好夢隨潮去
月落空江萬樹烟

中秋日晚雨忽霽與諸友看月

晚雨新晴客款扉
天時樂事不相違
眼前愁緒浮雲散
坐上佳人碧月輝
誰見入河蟾不沒
空憐繞樹鵲驚飛
多情惟有清光舊
照我年來白髮稀

對酒

晚得酒中趣
三杯時暢然
難忘是花下
何物勝樽前世
事有千變人生
無百年還應騎
馬客輸我北窓
眠

觀書

老眼視茫然
時時手一編
未能忘習氣
聊復遣餘年
敲

枕山窓下篝燈細雨邊誰應知此味自結靜中緣

煮茶

絹封陽羨月瓦缶惠山泉至味心難忘閒情手自煎地
爐殘雪後禪榻晚風前爲問貧陶穀何如病玉川

晏起

林下將迎寡顏然萬事捐老知閒有益病與嬾相便殘
夢荒雞外輕寒總帳前從教貧到骨不負日高眠

甫田集卷十二

欽定四庫全書薈要卷一萬七千二十三

集部

甫田集卷十三

明文徵明撰

詩三十六首

春雨漫興

春雨蕭蕭草滿除
春風吾自愛吾廬
高情時誦閒居賦
老眼能抄種樹書
金馬昔年貧曼倩
文園今日病相如
焚香燕坐心如
水一任門多長者車

雨後

積雨初收風乍顛城南花事已茫然黃鸝繞樹空千轉
白髮傷春又一年竹几蒲團供坐睡茗杯香鼎有閒緣
客來莫話長安事自理南華物外篇

壽方矯亭

季鷹久已卧江東再入修門簡帝裘白首豈知東觀樂
青山終戀北窓風一時出處如公少六袞庚年媿我同
願把綸竿相逐去江湖滿地兩漁翁

上巳日石湖小集

楞伽湖上晚風和
茶磨巖前宿雨過
士女競浮青雀舫
野人自占白鷗波
春來花鳥閒情在
老去山林樂事多
辦取一樽酬令節
扣舷聊和竹枝歌

結草菴僧相邀阻雨不行

城南有約訪招提
風雨滄浪只尺迷
惆悵一春能幾醉
蹉跎四事苦難齊
花間細溜沾衣袖
道上豐泥沒馬蹄
孤負山僧清淨供
一窻離思共誰題

夜坐

幽人被酒夜不眠攬衣起坐垂堂前
差參花影忽滿地
仰見明月流青天微風吹空星漠漠
時有羈鴻度寥廓
美人不來更漏沈
天南縹緲銀河落

庭前蜀葵

庭下戎葵高十尺紫莖入簾明的
蝶誰令艷質不逢春
却有丹心解傾日輕塵不飛朱夏
清翠翹鏤日陰亭亭
南風吹幃殘酒醒寂寞闌干盡方
永

賦得廬山送盧師陳

誰見匡廬百疊蒼輶車八月下潯陽天開畫障芙蓉出
風約銀河瀑布長秀色從來堪攬結壯遊還待發文章
因君忽動江湖興便擬東林問草堂

睡起

睡起西齋片雨過綠陰庭院晚涼多烏衣春盡渾無語
白苧秋來漫有歌世態風雲從變幻山林日月未蹉跎
却憐逸少猶多事時寫黃庭換白鵝

八月初九日見月

暮空雲斂月初弦露氣星光共渺然回首棘幃供試事
秋風夢斷十三年

無錫道中遇雪夜泊望亭

北風吹朔雪飛霰雜零雨孤舟暮不前收帆得沙渚天
垂野陰合日暝江雲沍川原入蕭條林木積縞素寒隴
噤不鳴饑鳥驚還聚舉酒不成懽挑燈時自語飄泊豈
在遠出門即羈旅

長林風怒號天低浦雲黑空村烟火微近渚漁舟集路

暗行迹稀蒼然見寒色野泊不成眠羈魂還惻惻昏燈
黯欲絕歸夢迷咫尺成遠更漏沈川寒聲影息不知積
雪深夜久孤蓬仄

閏正月十一日遊玄妙觀歷諸道院晚登露臺
乘月而歸次第得詩七首

探春行覓羽人家洞裏仙桃未着花一段閒情杯酒外
山童能供竹間茶

行披瑩確履蒼虬曲徑穿雲古洞幽只尺風烟千里外

居然人境見丹丘

仙侶登真幾百年清風遺影尚依然
琳琅翰墨精神在
我欲臨文喚恕先

道人相見古梅邊爲寫幽情拂響泉
窓外南枝春尚淺
雪英千片落水絃

春風吹鬢思悠悠來上彌羅百尺樓
城郭萬家塵似海
祇應高處不知愁

古殿悠悠徑有苔松扉端爲野人開
匆匆不盡登臨興

有待他時看竹來

神清殿曲倚闌干市散人空萬井閒
莫負仙臺今夜月
明朝日出是塵寰

二月廿六日遊天池諸山

西北羣山列翠屏
天池宛轉帶支硎
行穿壑谷身忘倦
忽聽松風酒又醒
歲閏故應春緩緩
民饑欣見麥青青
老年行樂知無幾
莫負樽前雙玉瓶

九月婁門勝感寺

晚禾垂穗野田平
九日登臨宿雨晴
出郭由來少塵事
逢僧聊得話浮生
秋霜落木黃花節
破帽西風白髮情
却喜東林能破戒
提鉶沽酒醉淵明

北江憲副自越州訪余吳門飲於杜氏明遠樓
相逢相別思悠悠
越水吳山爛漫遊
時事難言聊對酒
長安在望漫登樓
百年春夢蕉中鹿
萬里秋風海上鷗
不盡平生相許意
白頭頻把舊吳鉤

除夕

乙巳

樽酒淋漓半醉餘
疎燈寂歷夜何如
一行剛了床頭歷
四壁聊齊架上書
衰齒可堪時數換
窮愁應與歲俱除
東風喜得春來准
早有梅花慰索居

元旦書事

丙午

奕奕祥光報令辰
融融淑氣轉洪鈞
開門聊自占風色
展刺先欣見故人
晴日笑談驚隔歲
暮年光景喜逢春
桃符歷日年年事
一度相看一度新

五月望日登望湖亭

是日微雨作寒

木末虛亭瞰碧瀾
倒飛天影入憑闌
嵐光浮動千峯濕
雨氣薰蒸五月寒
石磴躡雲芒履短
松風吹雨苧袍寬
狂吟莫怪遲歸去
白髮還能幾度看

汎湖

春盡南湖碧玉流
故人湖上共夷猶
平橈野渡沿青草
疊鼓中川起白鷗
雲日霏霏梅子雨
風蒲獵獵藕花洲
行春橋外山千疊
盡逐波光上綵舟

除夕

酒闌燈燼夜茫然撫事追思十載前坐上漸看同輩少
眼中殊覺後生賢江城寒薄梅花早原野霜清落木堅
皮骨已空心力盡還將衰髻待新年

丁未九日與履約諸君同汎石湖就登上方

宿雨初晴水拍天碧雲微斂日華鮮時當黃菊茱萸候
秋在滄洲白鳥邊柳外畫橋人似蟻湖心蘭棹酒如泉
攜壺更醉湖山上白髮重逢又一年

是歲閏九月再汎

剛喜重陽臨閏月不辭老病復登臺多情秋色依前在
有待籬花故晚開佳節從知難再值青山端不厭重來
畫船記取橫塘路十里笙歌載月回

題畫

溪雲冥冥溪雨急長空倒垂溪水立凌亂春潮萬壑搖
低迷暮靄千林濕余生雅有滄洲適曾擁孤蓬聽蕭瑟
夢斷紅塵二十年江湖獨往興依然偶拈秃筆掃東絹
便覺吳松落并剪金君家住雲水鄉朝烟暮雨對林堂

若爲老去厭真蹟，翻愛狂夫灑狂墨。就中妙解誰應識，
萬里雲烟開素壁。

紫瑤翠琰開蒼壁，下有蒼松幾千尺。濃陰羃歷森畫寒，
虬枝拂空根束石。石連灌莽榛欲絕，路繞松根更斜出。
仙源近遠不可窮，却有幽人在山澤。山澤幽人坐倚松，
仰看出沒山雲空。眼中溶溶霏暮靄，耳畔稊稊鳴天風。
崩崖一線削積鐵，玉泉百丈飛晴虹。吳中山水清且遠，
老我平生素遊衍。偶然點筆寫秋巒，恍惚遊踪出東絹。

金君有癖與我同每每神遊翰墨中贈君此幅應有以
咫尺相看論萬里

十月山城霧雨收江南春淺類清秋
窻前覓得新成句
木葉蕭蕭雜水流

看山何必待春晴雨裏看山分外明
持盞衝烟覓詩去
不知身在畫中行

長松搖日影亭亭無限江頭倚杖情
鴻鴈欲來天拍水
白雲收盡暮山橫

雙禽棲息一枝安映雪離離更好看一種羈情誰識得
暮林風急羽毛單

壽東畬錢先生

東畬先生古貞臣平生耿挺標清真廿年中外肆駁歷
所至秉節宣皇仁浮雲漠漠有變幻長歧往往多風塵
孤征方出霄漢上一笑已脫風波身莫言有才用未極
天地深機自消息憑將強健博高官留取有餘還造物
祇今優游經幾年八旬行及顏蒼然霜松雪栢澗壑邊

紫芝玉樹階庭前人世長生能有幾如公豈獨神仙比
向來富貴等浮雲未盡勲名付兒子二兒駟馬日邊歸
捧檄升堂試舞衣靈椿丹桂初光輝嗚呼靈椿丹桂初
光輝千秋萬歲願無違

賀東畬錢先生構別墅

共說于公治獄仁還聞韋氏薄籬金生兒已副高門望
作室能忘肯構心一脉承傳書種在百年培養慶源深
庭前手植三槐樹會見森森長碧陰

已酉除夕

八十衰翁仍送歲
鑪薰燈影共婆娑
青雲志業消都盡
白髮光陰得最多
天地勞生空蠹簡
江湖得意有漁蓑
孫曾繞膝情堪戀
後飲屠蘇且笑歌

甫田集卷十三

欽定四庫全書薈要卷一萬七千二十四

集部

甫田集卷十四

明文徵明撰

詩四十八首

人日直夫東園小集

雪後江梅燦玉英蕭然人日半陰晴
雜占誰問東方朔
妙思空懷薛道衡
綵勝千年傳故事
菜盤七種薦春羹
白頭不落山林事
又向名園聽早鶯

立春

雪消紅日麗中天喜見鞭春在臘前
次第三陽開景運尚餘八日是殘年
梅花消息嚴寒後綵勝情懷薄酒邊
辨取物華供帖子暖痕浮綠草生烟

玉蘭花

綽約新妝玉有輝素娥千隊雪成圍
我知姑射真仙子天遣霓裳試羽衣
影落空階初月冷香生別院晚風微
玉環飛燕元相敵笑比江梅不恨肥

張夏山輓詞

憶隨仙侶仕瑤京幾度朝回並馬行回首舊遊成大夢
燕山吳水不勝情

出守毘陵歲再更我時吳苑亦歸耕相逢相別多惆悵
何況泉臺隔死生

春風陽羨百花明攜手張公洞裏行二十年來誰在者
白頭揮淚讀題名

三年常守念孤窮教養雍容有古風爲理無名百年賦
至今赤子頌張公

驄馬使君前建守仁恩十載兩回施武夷山下棠千樹
盡是張公去後思

叅藩江右寄旬宣一道清風萬口傳底事讒言能亂國
又將書劍下西川

西川戡難策勲名信是胸中有甲兵才大恨無施地用
西風吹淚錦官城

扁舟北上又新除別我吳門意有餘豈謂間關魂獨返
傷心空讀寄來書

記得相逢十載前
我時白髮子青年
却憐後死翻多恨
寒月淒風倍黯然

夏王山下月離離
宰樹驚風不盡思
惆悵高人埋玉地
何人爲寫墓前碑

春歸

三月春光積漸微
不須風雨也應歸
與人又作經年別
回首空驚昨夢非
江燕引鷓鴣芳草滿
林鶯出谷杏花稀
沈郎別有傷情地
不爲題詩減帶圍

題漁隱圖

江南雨收春柳綠
碧烟斂盡春江曲
十里蒲芽斷渚香
千尺桃花春水足
溪翁鎮日臨清渠
坐弄長竿不爲魚
太平物色不到此
安知不是嚴光徒

江頭夏雨十尺強
晚波搖日空江涼
遊魚瀟灑樂深藪
不謂人間有漁筍
筍得江魚不稅官
自食自漁終歲歡
輸租轉賦世途惡
漁家自得江湖樂

漁翁老去頭如雪
短笠輕蓑舟一葉
百頃魚蝦足歲租

十隻鸕鷀是家業橫笛朝衝柳外風浩歌夜弄波心月
不嫌湖上有風波世路風波今更多

烟沈風緊鳴蕭蓼江湖歲晚玄冥肅寒塘日出曉光浮
村甕茅柴酒初熟網得冰鱗不入城自漉瓦盆招近局
欸乃一聲烟水長葦深江靜燃湘竹

阻風宿九里湖

雲涵長空斷鴈呼水聲摧岸雜風蒲扁舟卧聽三更雨
一葦難航九里湖繞榻波濤歸夢短隔林烟火遠村孤

人生何必江山險咫尺離家即畏途

梁溪道中夜行

雨餘新水漫風外一帆輕山繞湖南去人從畫裏行天
空雲樹渺月出暮潮平烟靄知何處漁歌時一聲

辛亥除夕守歲

坐戀殘年漫有情夜堂燒燭待天明不愁老大無同輩
低覺聰明愧後生得歲笑看新舊歷無眠厭聽短長更
香消酒冷人初靜忽報晨鷄第一聲

壬子元旦飲毛石屋家觀郡邑迎春蓋明日立春也次東坡韻

昨夕今朝迹已陳
頭顱種種歲華新
土牛郭外才驅厲
綵燕筵前已得春
對酒不應談世事
賞心剛喜及良辰
坐中潦倒誰應甚
老我頽然第一人

新夏

暖風庭院草生香
晴日簾櫳燕子忙
白髮不嫌春事去
綠陰自喜夏堂涼
閒心對酒從時換
老倦拋書覺晝長

客有相過同一笑竹爐吹火試旗鎗

袁魯仲邀予登列岫樓予自胥臺沒數年不登
矣

故人湖上有高樓十載清罇續舊遊飛翠窓中仍列岫
片帆天際見歸舟依然綠樹啼黃鳥無賴青山笑白頭
不盡阿戎淹戀意渚雲江草兩悠悠

是晚過行春橋翫月再賦

行春橋上月娟娟杜若洲西宿畫船萬鏡不波天在水

四山沈影夜如年
已知世事皆身外
肯着閒愁到酒邊
宛轉清歌出林表
晚烟依約正蒼然

虎丘觀雨

海湧春嵐濕翠鬟
生公臺下雨漫漫
風迴陰壑奔泉黑
雲鎖蒼池劍氣寒
淨洗塵氛開絕境
不妨烟靄是奇觀
詩人自得空濛趣
悟石軒前獨倚闌

送族弟彥端還衡山

彥字諸孫端甫良
秋風訪族自衡陽
百年文物家聲在

累葉松楸世澤長君視前人應不忝我於同姓自難忘
不堪相見還相別楚水吳山意渺茫

舊送彥仁一首追錄於此

南望衡陽舊德門虎符元帥有諸孫山川我正懷桑梓
水木君能念本原兩地衣冠曾不乏百年忠孝至今存
相違不盡相留意狼籍秋風酒滿樽

寄顧橫涇

我別橫涇三十年同遊都盡獨巍然淵明誰送東籬酒

季子原無負郭田
貧病豈知翻益壽
聰明莫道不如前
相思相見知何地
夢破秦淮月滿川

寄許仲貽

問訊幽人白下蹤
若爲清世不相容
幾回對月思玄度
安得披雲見士龍
落日橫塘折楊柳
秋風南浦夢芙蓉
相思滿目烟波遠
吟得新詩手自封

題吳雪洲磨厓神異卷

齊雲西來巖壁立
天削芙蓉千仞碧
誰能題字碧雲端

吳生袖有如椽筆蟠金屈鐵紛琳琅天門恍忽蛟龍翔
夢中神授若有得覺來信手筆已忘

二句坡詩也

坡翁此語

信竒絕千年似爲吳生設老夫拈出贈吳生一笑千峯
秋月明

九日雨中虎丘悟石軒燕集

何處登高寫壯懷生公說法有層臺漫脩故事攜壺上
不負良辰冒雨來應節紫萸聊共把待霜黃菊故遲開
白頭八十三重九竹院浮生又一回

素髮

素髮絲絲不滿梳
衰容覽鏡已非吾
蕭條暮景看離菊
次第秋風到井梧
物外機心聊弈旨
老來多事坐詩逋
祇應雙足能強健
著屐登山未要扶

壬子歲除

殘燈明滅照頭顱
八十三齡過隙虛
一歲又從今夕盡
餘生消得幾番除
老知無地酬君寵
貧喜傳家有父書
獨有梅花堪慰藉
春風消息定何如

癸丑元旦

咿喔鄰雞過短垣
起看曙色拂塵冠
昇平滿目新頒朔
日月無窮又履端
短髮蕭疎霜葉脫
壯心零落曉燈殘
從前卉物冰霜盡
一樹梅花獨耐寒

夜泊南潯

春寒漠漠擁重裘
燈火南潯夜泊舟
風勢北來疑雨至
波光南望接天流
百年雲水原無定
一笑江湖本浪遊
賴是故人同旅宿
清樽相對散牢愁

晚泊楊莊

碧雲微斂四山蒼
晚泊孤舟對夕陽
店舍寂寥斜帶水
人家籬落盡栽桑
風煙入望知何處
鷄犬相聞自一鄉
正自旅懷眠不得
數聲漁唱起滄浪

寄胡栢泉

當日籌邊事最更
曾看疏草識高名
旋收書札渾如面
未及交歡已有情
塞上底須論馬失
周南空復著書成
遙知西澗春潮急
野渡孤舟盡日橫

南樓

狂搔白髮倚南樓落日邊聲入暮愁
萬里長風誰破浪一時滄海遂橫流
敢言多壘非吾恥空復崩天負杞憂
安得甘霖洗兵馬浮雲明滅思悠悠

送袁裕春僉憲之建寧

拾遺省闈歲才更忽領行臺撫建寧
喜見勝之持使節却教汲黯去朝廷
民情有待隨車雨天漢先瞻執法星
雅志高懷何處寫武夷山有晦翁亭

秋夜

四壁鳴蛩露下餘片雲收雨酒醒初風掠墜葉秋聲早
月印空庭夜色虛衰病不禁時敘改蕭閒自與世情疎
若爲白首安眠地時有驚塵報羽書

九日遊雙塔院次淵明己酉九日韻

時敘不容淹忽忽寒暑交矧余蒲柳姿望秋已先凋山
林樂閒曠勢途利崇高人性各有適奚但壤與霄爰以
一日歡酬此卒歲勞古來明哲士取材不遺焦銜觴輒

忘世何似栗里陶得酒且復樂安能待來朝

十日遊治平寺再疊前韻

季秋氣未肅鳴禽尚交交澄空霜華薄木葉不盡彫
輿陟前岡不覺身已高回視平湖東逸峯聳晴霄但欣
雙目明寧辭一身勞物理會有窮何以心煩焦世情共
擾擾吾樂方陶陶達人悟遷化千載猶一朝

自華亭還吳夜泊磧磯

放棹華亭指故園九峯晴色接吳門秋風沽酒唐行市

斜日維舟磧，磯村墟落風烟沙。漱口人家燈火竹籬根。
機雲踪跡今何處？一望岑山一斷魂。

送何元朗南京孔目

一命周行列，鎬京閒官剛喜玉堂清。紫薇蘭省聊通籍，
綠水紅蓮亦宦情。爽氣鍾山秋拄笏，春風鰲禁曉聞鶯。
白頭老友難爲別，飛夢先馳建業城。

寄何叔昆禮部

爲愛君家好弟兄，列官同在鳳凰城。遲遲宮漏薇垣靜，

浥浥蘊烟畫省清風雨夜堂聯榻處池塘春草看詩成
相逢相別還相憶白髮江湖無限情

維亭夜泊

孤篷燈火宿維亭宿酒微消夢不成人語烟中江月墮
舟橫渡口夜潮生閒情歲月都無迹舊歷村墟尚有情
四野孤霜旅葉冷時聞沙上水禽聲

除夕

白髮婆娑夜不眠孫曾繞膝更翩跹已知明旦非今日

不覺殘齡又一年
舊事悲歡燈影裡
春風消息酒杯前
更聞人靜雞聲起
却對梅花一粲然

甫田集卷十四

欽定四庫全書薈要卷一萬七千二十五

集部

甫田集卷十五

明文徵明撰

詩三十一首

元日試筆

雲霞駘蕩曉光和
手折梅花對酒歌
暮齒不嫌來日短
霜髭較似去年多
東風漸屬青陽候
流水微生綠玉波
鳥弄新音晴晝永
相看不飲奈春何

竹堂

乘閒上日到僧家
慚愧空門有歲華
滿地碧烟新草色
一痕春意早梅花

人日王氏東園小集

晴飈汎叢條
浮陽散修莽
良時及初正
涉七氣已爽
厥日肇惟人
探占喜融朗
駕言求友生
名園欣獨往
折蔬充朱豆
扶藜企高壤
陟彼墻下岡
寄此天際想
披草晨風和
隔竹春禽響

湛甘泉兵書以詩招遊衡山奉荅

家世衡陽有釣臺江湖流浪未能回政懷桑梓千年計
忽枉封題萬里來月滿羅浮勞我夢雲埋嶽麓待公開
追攀見說襟懷壯儻許春風杖履陪

寄黃泰泉學士

經時不得嶺南書白首無由慰索居北闕聲華應藉甚
西山爽氣定何如殘編空復淹司馬當路何人薦子虛
三十年前潞河夢一回相念一躊躇

除夕

坐戀殘燈思黯然回看殘歷已無緣
萬千舊事空雙鬢
八十明朝又六年
笑飲屠蘇甘落後
老嗟筋力不如前
烽烟不隔春風信
次第梅花到酒邊

乙卯元旦

滄溟日日羽書傳
華髮蕭蕭節敘遷
時不可追空逝水
老今如此況烽烟
漫拋舊歷開新歷
却到衰年憶少年
潦倒不妨詩筆在
曉窓和墨寫新篇

病中承次河攜樽過訪

病暑經時閉草堂故人挈榼漫相將
高軒恰似清風至雅誼還同夏日長
把酒臨軒疎雨潤捲簾深院碧桐涼
晚來客散詩成處一樹蟬聲對夕陽

閒興

綠陰深覆草堂涼老倦拋書覺晝長
塵土不飛髣几淨寶壺親注水沉香

蒼苔綠樹野人家手卷壺薰意自嘉
莫道客來無供設一杯陽羨雨前茶

繞庭芳草燕差池滿院清陰樹綠離簾捲不知西日下
自持閒客了殘碁

酒闌客散小堂空旋捲疎簾受晚風坐久忽驚涼影動
一痕新月在梧桐

閒門謝客日常扃好鳥隔林時一聲暖氣薰人渾欲醉
碧梧窻下拂桃笙

端溪古研紫瓊瑤斑管新裝亦免毫長日南窻無客至
烏絲小繭寫離騷

乙卯除夕

燈前歲酒笑相酬
鏡裏流光又一周
人世百年原有限
吾生萬事總無憂
餘窮不用焚車送
殘病都從爆竹休
去日已除來日在
春風檢歷又從頭

丙辰除夕

百歲匆匆過隙駒
等閒八十七回除
蹉跎日月前無幾
俯仰乾坤樂有餘
白首詩書重結課
青春草木舊吾廬
由來多病還多壽
一笑殘痾未負余

丁巳元旦

昔隨元宰賀正元
鹵簿分陳舜樂懸
萬炬列星仙仗外

千官鳴珮玉階前
履端同慶承天語

是日羣臣致詞畢
上宣旨云履端之

慶與卿
等同之

山壽齊呼祝聖年
潦倒今無朝省夢
綢繆空憶

御鑪煙

穀日早起

空庭草色映簾明
短髻春風細細生
簷溜收聲殘雪盡
窓光落几曉寒輕
非賢寧畏蛇年至
多難欣占穀日晴

詩思攬人眠不得
山禽屋角有新聲

四月

風雨將春去清和
四月天桐陰搖白
日草色散青煙興
寄琴樽外筋骸杖
履前若爲消永晝
窓下有殘編

春雨綠陰肥雨晴
春亦歸花殘鶯獨
囀草長燕交飛香
簋青繒扇筠窓白
葛衣拋書尋午枕
新暖夢依微

五月

逕草侵衫色庭梧
生晝陰時光臨角
黍穡事望梅霖習

靜壚薰細醒煩茗椀深草堂賓客散歌枕聽幽禽

夜坐

涼聲傳漏點夜色轉樓陰遙漢三星度空庭萬籟沈草
輝螢箇箇樹影月林林稍覺塵氛遠閒愁不上心

送彭赴嘉興訓導

清時一命忝師儒百里鄰州接里閭志養于今欣有祿
官貧莫嘆食無魚微名聊足酬初志多暇何妨讀舊書
九十老人須在念頻頻書札問興居

東望嘉禾近百程
漫隨儒牒去親庭
蟬聯宦業承三世
辛苦傳家有一經
我老自憐衰髮白
汝行不失舊壇青
還應別後鍾情處
飛夢時時秀水亭

丁巳除夕

易却桃符拂却塵
窮愁殘病總更新
三彭漫守庚申夜
萬事重迎戊午春
狼籍杯盤聊復醉
盡情燈火笑相親
孫曾次第前稱壽
慚愧承平白髮人

戊午元旦

黃鳥風簷遞好音
白頭窓下整冠巾
喜聞海上烽煙息
又見人間日月新
霽景騰輝金勝曉
暖痕霏雪玉梅春
何當載酒尋芳去
綠滿郊原草似茵

初春書事三首

疎簾揜映物華鮮
睡起西窓思黯然
落日斷雲收宿雨
暖風纖草漲新煙
寂寥樂事燒燈後
懶慢情懷拄杖前
幽興不緣愁病減
時時覓紙寫新篇

流雲冉冉度湘簾
綠映輕衫草色鮮
淑氣薰人淹宿酒

花香入夢惱春眠影搖鎖影霏霏日篆裊
爐薰細細烟門掩紅塵無過客自臨南牖了殘編

晴雀飛飛戀草簷午風漠漠泛茶煙雪殘東圃梅花後
春在南牆細草邊窓下蟲編消永日鏡中華髮感流年
詩逋畫債難推脫應負平生筆墨緣

南樓

南樓日上曉光澄北郭烟消萬井明膏雨一番甦弱柳
春風幾處囀新鶯祇應舊病隨寒盡無復閒愁共草生

起遶江梅覓新句惜花自是老年情

肇孫北行

阿翁九十苦鍾情倚杖那堪送汝行
壁水去遊天子學春風須聽上林鶯
壯途初發千山輟雅志無忘萬里程
三百年來忠孝在慎言無愧舊家聲

己未元旦

勞生九十漫隨緣老病支離幸自全
百歲幾人登耄耋一身五世見曾玄
祇將去日占來日誰謂增年是減年

次第梅花春滿目可容愁到酒樽前

欽定四庫全書

甫田集
卷十五

甫田集卷十五

欽定四庫全書薈要卷一萬七千二十六

集部

甫田集卷十六

明文徵明撰

敘十三首

送周君還吉水敘

故工部尚書周文襄公撫循江南大有功德於民去之
五十年爲弘治己未有詔以公與故戶部尚書夏忠靖
公並祠於吳從有司之請以慰荅吳民之願思也明年
廟成廟有像設而公去吳久蔑所儼似於是公之孫廷

器自吉水以公畫像來訖事乃去吳之老長先生以吳人幸於奉公顏色而喜廷器君之來也謂其歸不可無言猥以屬某某之生在公去吳二十年之後然習聞遺德宛猶瞻承有不容已於言者方宣德之初當朝家多事之後公私弊極公以幹運之材撙富民之術以拓賦財之源博收衆議首勤民隱劬農振業歲亦比登民樂於所入而不知苦其出上享其用下茹其澤者二十有二年徵公之績法得祀久矣顧方相安於無事而事之

成固亦有竢於論之定也是故公在而樂既去而思思
久而不能忘越五十年而卒用食其報於吳此固無傷
於緩而益有以見公之德澤深長非苟焉圖塞目前之
爲也竊惟東南賦財之會百需出焉不培其根而日竭
其出出倍而末亦益瘁矣方公未至之先有司誅求不
少弛而積逋至八百萬公既損民常出而官復羨贏此
雖公之才局去人遠甚而其理亦豈不有可推者哉今
聖天子不違民思以昭耿勲誠不能無所望於後之人

也惟公思澤繫民心功業在史官而血食之詳當有記
廟之成者余特敘其槩以榮君之行亦聊以寄吳人之
思云爾

僉憲伊先生感事詩敘

僉憲伊先生侍其家君承德公之居吳門也某以里中
契家子獲從容侍杖屨先生爲言先朝拔擢之恩與先
夫人子育之德輒慷慨流涕如不能已他日示某三詩
則感事之作也先生成化末自蜀臬入賀萬壽節屬龍

馭升遐弗獲成禮爲二韻詩二章先是以刑曹郎推恩
褒錄其親而母氏遺榮久龍章賁於藏丘爲四韻詩一
章還吳來十又四年而遺弓之痛罔極之情不少置至
是出其詩屬交遊諸公和之而命序於某某小子何用
知此受簡累年未有所復顧其意不可虛辱也則爲之
序曰忠孝天下之大閑也然非有出於尋常日用之外
顧其事有本末而人道之所爲盡與否存焉是故厄窮
顛頓不能自見於世者常患不獲申其志而一參於富

貴狎於恩私則或犯名廢義而併其所學焉負之至於
事變恩移不能無悲摧感感之情其事足慨也而君子
乃有取於先生以爲得忠孝之理焉夫豈以其悲摧感
感以爲難哉先生以進士高科踐駁中外爲明執法爲
良監司道究當時譽聞敷於上下而寵被於君私又得
以顯光其親雖其所學所養有以迓承之而遭罹昌會
獨非君親之賜乎顧吾所以復之者方永而遽絕欲用
其情而無所於施其悲摧感感當有甚於不幸而不得

志者其何能已於言邪此先生之詩之所爲作也讀其詩知其不忘於遠而極其情爲能不負於所事夫仕而不負於所事而又不忘於遠雖古聖賢之事無出此者而余顧謂無難焉何哉夫其始也不出於厄窮顛頓而卒又能不辱其身以及其親是其見於行事者既已卓然名世使無是詩固不得少其忠孝之名也而是詩之發實又至誠惻怛而出於不能自己之中然則何難哉夫惟其不難也而後知其本於尋常日用爲能得忠孝

之實焉悲摧感感果足以盡先生哉先生名乘字德載其先有尚寶卿恒工科給事中侃皆名臣先生其世濟忠賢者歟

送侍御王君左遷上杭承敘

國朝以仁厚立業更累朝列聖綱維綜核之餘誕章丕緒深密完固殆無可施力而士之用世亦惟持重博大爲宜或稍出廉隅有所建畫徃徃得喜事徇名之謗及今百餘年所以消沮浮薄崇長忠厚誠不爲無益也而

其間固亦有幸於無事以自蓋其瘵曠之愆者矣蓋選
要蓄胸謂惟因循自恕足取持重博大之名嗚呼古之
所謂持重博大固如是哉往歲先君以書問士於檢討
南屏潘公公報曰有王君敬止者奇士也是故吳人他
日還吳某以潘公之故獲締好焉及君以行人遷監察
御史先君謂某曰王君有志用世其不能免乎乃弘治
庚戌君以事下詔獄鐫兩階左除福建上杭丞始君按
遼陽明法守軌多所緒正用事者不便爲飛語中君而

其徒有氣力者又從中醞釀之而君遂得罪去議者謂君不自省約以斂怨時人迄抵禍敗或又謂君感槩激昂不能俯仰其得罪固宜而亦其所樂受凡此皆非所以論君也君以聖天子耳目之臣奉使邊徼其任不爲不重而遼陽國家要害不得不慎苟爲避喜事之名因循自恕以僥倖塞責則循習之弊將久而益滋而一旦事出非料則其禍之所遺豈獨一身一家而已哉故操切屏捍惟法之循至於得罪以去固非所樂而實亦所不

暇計其心誠不欲以一身之故而遺天下之憂若君者
今之所謂喜事徇名而古之所謂持重博大者歟此潘
公之所謂奇士而先君之所爲歎其不免也君將赴上
杭取道還吳吳撻掖之士聚詩爲贈而推敘於某因敘
君之所以得罪之故而復推本其所存如此雖然天下
之事尚有大於此者君當無以是自懲

靖海頌言敘

正德改元之禩侍御曾公以簡命按蘇蘇屬邑崇明治

東海中其民素獷健梗治先是豪民施天泰爭魚葦之利噪於海濱有詔徙其家遠州其黨鈕東山者潰歸逸於海復嘯其徒爲亂出沒鹵掠民不勝擾於是瀕海諸邑復大震有司以聞詔發諸路兵討之而公與今中丞父公實領其事夏四月首事徂秋八月竟扼賊而殲之降其脇從俘其老弱而四民用寧方賊之猖蹶也郡郭亦警及是解嚴士民懽曰凡所以惠安我民以保生聚得不及於難者皆侍御公之力侍御公實生我民其曷

以報乃相率爲詩詠歌其事而屬敘於余竊惟天下之事不可常而人之才貴乎養之有其素今夫銜一命寄一方孰不幸其無事也而事變之來或出於意料之外彼齷齪選奕往往避事而害成而好爲不靖者又或挾之以僥倖於一擲以爲功名之會此其人皆以身爲計者卒之亦不能辨其身而民用受其辜焉侍御公之來當夫承平百年之餘而蘇又在畿輔之內豈常有意於變哉而卒然遇之有不易於爲計者而公處之無難焉

方師之興餉給浩穰文檄旁午凡審勢相方部分調發
莫不於公之出人皆訝其不素而克而不知其所已試
於爲邑者既嘗驗矣蓋公初以進士宰定遠適妖賊構
亂勢張甚公設奇禦之用全其城今悉數郡之衆以當
區區竊發之徒固已優爲之矣是豈僥倖於一擲者哉
公之出按也以志計銷頑梗以德惠撫疲瘡仁威並著
吏畏民懷庶政之舉不可殫述茲特著其平寇之一事
云爾

送劉君元瑞守西安敘

正德戊辰金陵劉君元瑞以刑部屬出守紹興尋以先
事忤權倖罷自被命至去郡爲日僅五十有六然而紹
興之人惜其去如失慈母父老子弟奔走追餞爭致餽
遺君悉麾去無所取乃相率飾祠廟肖君像事之於是
劉君之名一日聞天下庚午更化悉起前時被斥之人
首擢君知西安府君初罷官貧不能歸迤邐至吳興吾
友吳君汝琇客之至是汝琇與郡逢掖士聚詩爲君贈

不遠百里走吳中乞余敘其事余惟劉君奇才雋望遭
罹盛會當有名公碩儒道譽揚摧而何以余言爲哉汝
琇曰此劉君之意也雖然古之人贈人以言得其善則
稱知其過則規余於劉君何居曰劉君不走求王公貴
人而必子焉是徵其意非直以譽而已嗚呼此劉君之
所爲異於人而一郡有不足言也夫君以兩月之政而
能歸乎數十萬戶之人以聳動乎天下雖天下之人莫
不以劉君爲不可幾及也而君顧不以自足若有望焉

誠以事變之來靡有窮既而隆譽之下讒毀攸基方其
去紹興也天下之人想聞其風采莫不欲以爲郡以爲
猶紹興也然而風土有遐邇事緒有順逆而人心有從
違君自視於此果能皆副其意乎一有不獲則舉向之
所有而盡廢之加疵焉是故以黃次公之良天下習其
名人主欽其節而卒之不能周旋於末路夫豈其後之
所爲真有忝乎哉良以望之者厚也望之也厚則其責
之也深顧茲藐焉而人之望之若此其責之若彼則亦

豈易爲酬哉君不以人所不可及者自多而以所不易爲者自力則其所至獨可以收譽於一郡而止邪君始之罷也間關羈逆人將不堪其憂而君蕭然自得方益進於學圖史筆硯若將終其身一旦起自閒廢寵以壯郡莫不爲君喜也而君方有懼焉此其中豈無所見哉往余嘗從人聞君紹興之政而吾友陳君魯南王君欽珮顧君華玉君鄉人也又爲余道君文學制行之詳竊慕之其居吳興距吳門數舍而近雖不及接話言而相

聞爲稔故於君之行也不嫌於規

送提學副使莆田陳公敘

正德壬申之秋詔嘉興守莆陽陳公爲山東按察副使
領提學事先是弘治中公以監察御史視學南畿振德
警愚軒輊爲允數年之中士修名行而文以丕顯朝野
翕然稱之謂公之道化流行得古人表帥之義未幾逆豎
盜權謀亂庶政天子惑之公上疏極諫遂以得罪鐫兩
階左遷潮之揭陽丞朝野又翕然稱之謂公之風采磊

落有古人正諫之風及朝廷更化同事者往往內補而公稍起倅嘉興尋以爲守於是朝野之人莫不惜之以爲公之賢明宏達宜在師資之地守振肅之職而顧浮沈常調不亦負乎此固天下之公言而某則以爲世俗之見耳非所以論公也比公雖官御史而奉使於外非在得言之地可以不言而言之冀有以行之耳得罪去國豈其志乎夫既已得罪則投竄推辱有所不辭又奚班資之計耶苟計於是則患失之心惟日不足充位固

恩齷齪自守又甚而敗名棄節以獵華要高爵厚祿垂
手可得舍是弗圖而區區於外內升沈之間雖愚人不
爲也而公豈爲是哉惟其無心於是是能效忠輸誠慨
慷激發得以行其志而成其名視彼僥倖恩私以徼榮
一時者涕唾之不若也又足以辱公乎哉而天定理還
事不終敝所謂高爵厚祿卒以畀之此雖理所必至而
事有不盡然者則幸不幸存焉幸而得之於公爲無負
不幸失之則其所爲高一世而望天下者固在也公又

何媿乎夫公不圖世之無負於我而求有以無媿於世
充是心也蓋有無入而不自得者雖宰天下可也一方
視學之寄果足爲公重輕哉雖然自公爲丞而倅而守
天下之人想聞其風采蓋莫不願爲之奔走也而魯獨
得之經天下者殆有意乎何者魯爲聖人首化之地比
歲盜賊殘毀瘡痍特甚非仁明愷悌以斯道爲任者固
不能撫摩而振起之也公行矣濟溺起衰將爲天下先
也某以諸生辱公國士之知十年於此潦倒無成方懼

爲門牆之羞而公眷存不已今茲由浙而魯得再見於
吳門因獻是言而必以天下望之者固天下之論也

送開封守顧君左遷全州敘

吾友顧君華玉少負才雋以文學聞於時筮仕宰廣平
又以吏能聞升朝爲郎以清強聞及守開封綏懷得情
剴裁靡室而其聲聞益閎以達余交其人久竊嘗考其
所爲而得其所存蓋天下士也或從毀之數其隱過不
遺餘力余始駭嘆考其所爲與察其所存無或異也正

德癸酉君得罪中官逮赴詔獄一時人莫不危君而余竊爲君喜已而君竟被罪鐫三階左除廣西之全州余乃益信余之所見不妄而君之事誠有人所不可及者蓋人之所爲誘於外者不能堅其中而順於道者未始計其外使君而能周於外以獵譽於時人則譽日益至毀亦從之身躋臚仕而道斯詘矣君子求信於道而不必崇其身寧失時名而不受識者之毀言考君之所爲得罪果以其道歟抑不以其道歟必有識之真而辨之

得其實者毀若譽於是乎在而向之毀之者安知其不
愧而爲譽乎夫始之毀之不遺餘力將以敗其行也卒
之無益於敗而反以譽焉至其得罪而去人方危之而
余竊以爲喜若是則譽毀榮辱皆不足以論君而所謂
文學吏治足以盡君乎哉然余卒以天下士躋之亦求
其所存而已君故吳人而家金陵及是便道過家上塚
以行余得合諸友賦古律詩八首爲餞敘其首

送崇明尹吳君赴召敘

崇明爲蘇屬邑治大海中僅若一島故雖稱內服而不
得與列邑比其官府制度賦出章程視列邑率損十九
然其民獷健易動又其地有魚鹽之利易爭以擾而與
戍兵雜處一失撫寧輒梟獍以逆故其令長必循良重
厚爲宜而仕者往往不願得之或得焉憂畏忿懟同於
投竄一日代去輒喜如釋所負蓋其心鄙夷其民不屑
與理而恒傳舍視之噫亦過矣臨川吳君之爲是邑也
值邑豪施氏倣擾之後痼痍潰竭公私頽敝而遺孽方

潛禍未已君爬疏剔抉隨事經理而誠心撫循之邑用
大治逋蕩消弭無釁以發久而民益附以信未幾有游
寇之警君益料簡民兵繕治干櫓甫集而寇至以有備
得弗擾及是被徵且行爲余道邑中事歷歷謂苟嗣得
其人可以永理無患不然更兩年敝矣蓋苛條煩獄與
夫銳事徵名之爲皆足以尸之而其憂方深也若是豈
獨崇明之人不能釋君而君之心殆不欲遽遺其民而
去之也君爲崇明四年而厭難折衝恒居六七此人情

所不屑所謂憂畏忿懟同於投竄者而君安焉既釋而去孰不幸喜顧獨置憂不已此其心豈以崇庫近遠爲念而區區官爵烏足以易其愛民之心哉以愛民爲心則政必出於實而不以崇庫爲念則所職爲易修操履實之政而供易修之職焉往而不得治哉易外而內去州縣而即省臺固不足爲君喜而亦不足爲君慮也

送嘉定尹王君赴召敘

國家之制特重臺臣而其任也徃徃選於有司之良惟

其職與民親而所理錢穀獄訟與夫簿書期會皆官常
所急既久而習可以推行宏致故其授不得不重而於
其中尤重進士之科然其位下且遠視京朝官尊重不
啻什伯進士入官或厭棄不屑而得之者庸庸循守以
基歲月甫三暮而已束裝竢徵矣視其民曾傳舍之不
若而民之視之亦若過客去來漠然無所與者嗚呼國
家之所爲重臺臣之選而必有待於有司者其意固如
是哉四明王君以戊辰進士出知蘇之嘉定歷歲甲戌

始以御史徵而嘉定之民重惜其去顧其勢不可留則謀所以繫君之思而耆民劉璿氏從余乞言余於君有雅故固嘗重其爲人而於其去嘉定而就徵也加重焉蓋君自戊辰入官抵今六七閱歲苟能規隨趨辨以釣聲名以承上官之意則君內徙久矣萬一前此徙而去也不知嘉定之民所爲戀惜君者視今日何如也古之仕者重久任而下聲名蓋任不久則澤不流而聲名盛則誠或不至而民受其敝故余不惜其徙官之獨後而

獨幸其得民之久且深也於此有以知君之所存能以民事爲急以久遠爲計而非苟焉圖塞目前之爲也若夫錢穀獄訟簿書期會與夫官常所急乃所深習而練焉而朝廷所爲重臺臣之選必有待於良有司者君庶幾其無負哉

送提學黃公敘

國家取士之制學校特重自學校升之有司苟諧其試則謂之舉人自有司升之禮部苟諧其試則謂之進士

凡世之大官膺仕悉階進士以升進士之升有司禮部
實操之樞焉然而士習之隆污儒風之顯晦不與也惟
督學憲臣爲能軒而輕之憲臣之所趨士亦趨之憲臣
之所格士亦格之有不待文法教令而自無不及者蓋
其職專而其地又近故其於士也親而爲之化之也易
學校之所養有司禮部之所舉皆是人也是故有司禮
部能舉之督學憲臣能化之憲臣之所任不既重哉比
歲督學南畿者操其所謂主意以律士而峻法臨之謂

必合於是而後可學者至於摘抉經書牽率詞義以習其說而士習爲之一變有識者嗤之於是莆田陳公至特矯其弊而變焉陳公去而黃公嗣之黃公蓋嘗出陳公之門者凡其所爲悉出陳公而輔以高朗之識優以雍容之度破崖岸略章程而一出於正其所取士往往向時摘抉穿鑿者之所不齒而向所稱合格之士率廢不錄於是士皆崇碩大而黜異說上博綜而下訓詁數年以來士習爲之一變而善焉士習而善則有司之所

選禮部之所舉與夫朝廷之所登用有不善焉者不可得也嗚呼若公者豈非所謂能充其任者耶正德九年公以年勞擢拜按察司副使視學廣西屬學諸生咸惜其去而某特敘次其所爲變士習者如此某在諸生中最爲几下然不能摘裂牽綴在曩時爲甚而其見廢也視諸生亦甚故今之惜公之去也視諸生爲獨深

送侍御吳公還朝詩敘

正德八年監察御史吳公持節按太平諸郡軌道緒正

無所規隨挾微興壞所部振肅屬旁省盜起流劫新安
公疏捕追北境以寧救一時稱才焉然公重遲自將不
事搏擊而能達一方之急以宣明天子之恩其展采錯
事有出於尋常按職之上者列郡譽之而新安之民懷
其保釐之庸加譽焉及是代去相率歌其功能不遠千
里以敘屬余余不及識公而獨喜公得下人之譽有不
易易者夫國家建置百司各有專職惟御史隨事任授
不恒厥居而其任特重是故在內御史能言之而羣僚

九列聽之在外御史能行之而藩鎮諸司承之昔之論者謂其居中得與宰相相可否以爲重而不知今之在外者之重也而其中尤重巡按之任蓋今之制凡倉儲學校軍政茶馬鹽鐵之屬並御史關決然皆不相侵越而巡按御史獨得綜理而所部百官聽其軒輊事竣例以數語標刺其名上諸天官卿天官卿按以黜陟恒十九焉蓋天下之大天官卿不盡見聞而天子之耳目惟御史是寄御史實代天子行事故所至藩鎮大臣郊迎

惟謹郡刺史而下謁見拜俯惴懼惕息若不勝任而御史坐而詔之一有號令自藩鎮以下莫不奔走趨赴而是非得失往往竊議於下不以白間有以誼爭執者然亦鮮矣夫御史以一身臨百司之上以隆重之勢下視俯首趨事之人以當其傍睨竊笑而不之知若是得不敗以完足矣而或譽焉非其才足以濟物明足以燭理而重遲周慎有以任其事固不可得也余於新安之人頌公之言而有以知公之不易也公名鉞字宿威撫之

崇仁人

壽大中丞見素林公敘

成化弘治間中外之臣以氣節行能高天下者三數人而已一時朝廷之所倚注臺諫之所掄擬與夫大夫士之瞻屬依歸必在三數人者今大中丞見素先生莆田林公實一人焉孝考當宁三數人者以次獎擢亦既効用於時至於今三十年或老或死淪落殆盡而公歸然猶系天下之望嗚呼偉哉公於是年六十餘聰明強健

不減壯時而居閒既久無復當世之念會蜀寇告急中外
恒擾乃復有意事功朝召夕起來甲西馳專融妙略卒
用戡夷大難保蜀餘命功甫告成而公之身已在閩山之
南矣夫聞難而出功成而去之豈獨今之人所少哉而公
履之已素有不待今日而見者公初以司寇屬上書言天
下事指斥佞倖幾蹈不測既而收自放棄起歷要途若可
懲矣而執法糾檢又多忤物旋起旋廢曾不能三年留也而
天下之人方共高之公之心固不可

誣哉推公之心求公之事其有無益於當世必有能辨之者今四方多事用材如渴朝廷每申求舊之典而公方堅保晚之節或者謂公用不盡材於海內有遺望焉嗚呼此又奚足病公哉太史公有言人有所貴亦有所不如天不尚全故世作室不成三瓦而陳之使公都位食祿而享上壽造物者且將忌之矣於此或有損焉豈朝廷天下之利哉吾是以謂究公之用固不若完公之福之爲美也公文章道誼蓋於一時聲名出處重於朝

著婆娑故里順登期頤爲天下大老以潤飾斯世顧豈不多於彼哉此公所爲有樂於是而無用彼爲也公於先溫州最故而外舅叅政吳公惟謙在郎署時實又聯官相好某以通家之故凡一再接公別去十餘年光儀數範奕奕在目公之弟壽州守曩教長洲某以諸生獲出門下及是解郡南歸道出吳門爲余道公動定甚悉因徵言爲壽用敢論次如此而不以公用世爲願者斯特徵明厚公之私言也若夫君相之情朝野之論與夫

小人望治之心固將挽公而出之莫釋也嗚呼三朝舊臣所餘無幾天下之事將有屬焉公其自愛

贈長洲尹高侯敘

長洲爲蘇輔縣隸於郡下郡當東南要劇賦發章程率倍他郡而餽館勞徠靡有休閒郡既壯大而郡官尊安往往委勞於縣而長洲率先任之其繁視他支邑不特相百而已又其地介於東南卑瘠多滯民衆而貧稍急則斂怨緩則僇辱隨之繁詞蔽獄又每困塞故爲之者

鈞撫審畫矻矻簿書間救過不暇矧能潤飾以儒優游
文翰而稱治辨乎若夫才優剽割而譽以文敷雍容燕
笑而課奏罔後數十年來吾得高侯焉侯以進士高科
試邑於此始至而吏讐其嚴既而民安其業上官與其
能朞年之間邑以大治譽聞隆赫旌褒加焉然求其所
以爲理每出於簿書期會之外而讀書爲文無廢業焉
間引邑中賢士與相倡酬所歷山谿輒形紀述風流篇
翰照映一時論者往往以文學譽侯而不知侯之心未

嘗不以民也昔宋王禹偁以大理評事知長洲日事賦詠竟以文學知名徵入館閣在當時未嘗以吏最稱也然其言曰一邑之政田有暴賦丁有常傭春役而夏不休朝令而夕必具小則懲之以殿最大則懼之以刑法蓋極敍爲縣之勞而不以宓子彈琴爲是是豈專事賦詠以文章自好者哉蓋以政事行其所學而以文章蓋其所長其志固有在也豈若區區健吏收譽於一邑徼榮於當世哉去今五百年爲邑而課最者不知幾何人

今皆不能舉其姓字而禹偁風流奕然可想然則侯之志固有在此而不在彼者侯今以政事被旌固侯乃心斯民之效而非侯之所榮也以爲文學而譽之又豈足以盡侯哉

甫田集卷十六



總校官庶吉士臣張能照

校對官助教臣黃昌禔

騰錄監生臣鰲圖

甫田集卷十六



總校官庶吉士臣張能照
校對官助教臣黃昌禔
膳錄監生臣鰲圖